

# 寒山子詩集

附：豐干·拾得詩

# 目錄

序	一
寒山詩	五
豐干禪師錄	六四
拾得錄	六六
拾得詩	七一

寒山子詩集

# 寒山子詩集序

朝議大夫使持節台州諸軍事守刺史上柱國賜緋魚袋周丘胤撰

詳夫寒山子者，不知何許人也。自古老見之，皆謂貧人瘋狂之士。隱居天台唐興縣西七十里，號為寒巖。每於茲地，時還國清寺。寺有捨得，知食堂，尋常收貯餘殘菜滓於竹筒內。寒山若來，即負而去，或長廊徐行，叫喚快活，獨言獨笑。時僧遂捉罵打趁，乃駐立撫掌，呵呵大笑，良久而去。且狀如貧子，形貌枯悴，一言一氣，理合其意，沉而思之，隱況道情，凡所啟言，洞該玄默。乃樺皮為冠，布裘破弊，木屐履地。是故至人遯跡，同類化物，或長廊唱詠，唯言：「咄哉，咄哉，三界輪迴！」或於村墅與牧牛子而歌笑，或逆或順，自樂其性，非哲者安可識之矣。胤頃受丹丘薄宦，臨途之日，乃縗頭痛，遂召日者醫治，轉重。乃遇一禪師，

名豐干，言從天台山國清寺來，特此相訪。乃命救疾，師乃舒容而笑曰：「身居四大，病從幻生，若欲除之，應須淨水。」時乃持淨水上師，師乃嘆之，須臾祛殄。乃謂胤曰：「台州海島，嵐毒到日，必須保護。」胤乃問曰：「未審彼地，當有何賢，堪為師仰？」師曰：「見之不識，識之不見，若欲見之，不得取相，迺可見之。寒山文殊，遯跡國清；拾得普賢，狀如貧子。又似瘋狂，或去或來，在國清寺，庫院走使，廚中著火。」言訖辭去。胤乃進途至任台州，不忘其事，到任三日後，親往寺院，躬問禪宿，果合師言。乃令勘唐興縣，有寒山拾得已否？時縣申稱，當縣界西七十里內有一巖，巖中古老，見有貧士頻往國清寺止宿，寺庫中有一行者，名曰拾得。胤乃特往禮拜，到國清寺，乃問寺衆：「此寺先有豐干禪師院在何處？并拾得、寒山子見在何處？」時僧道翹答曰：「豐干禪師院在經藏後，即今無人住得，每有一虎，時來此吼。寒山、拾得二人見在廚中。」

僧引胤至豐干禪師院，乃開房唯見虎跡，乃問僧寶德道翹：「禪師在日，有何行業？」僧曰：「豐干在日，唯攻舂米供養，夜乃唱歌自樂。」遂至廚中竈前，見二人向火大笑，胤便禮拜，二人連聲喝胤，自相把手呵呵大笑。叫喚乃云：「豐干饒舌饒舌，彌陀不識，禮我何為？」僧徒奔集，遞相驚訝，何故尊官禮二貧士？時二人乃把手走出寺，乃令逐之，急走而去，即歸寒巖。胤乃重問僧曰：「此二人肯止此寺否？」乃令覓房，喚歸寺安置。胤乃歸郡。遂製淨衣二對、香藥等，特送供養。時二人更不返寺，使乃就巖送上，而見寒山子乃高聲唱曰：「賊賊退入巖穴。」乃云：「報汝諸人，各各努力。」入穴而去，其穴自合，莫可追之。其拾得跡沉無所，乃令僧道翹，尋其往日行狀，唯於竹、木、石壁、書詩，并村墅人家廳壁上所書文句三百餘首，及拾得於土地堂壁上書言偈，並纂集成卷。但胤棲心佛理，幸逢道人，乃為讚曰：

菩薩遜跡，示同貧士，獨居寒山，自樂其志。

貌悴形枯，布裘弊止，出言成章，諦實至理。

凡人不測，謂瘋狂子，時來天台，入國清寺。

徐步長廊，呵呵撫指，或走或立，喃喃獨語。

所食廚中，殘飯菜滓，吟偈悲哀，僧俗咄捶。

都不動搖，時人自恥，作用自在，凡愚難值。

即出一言，頓祛塵累，是故國清，圖寫儀軌。

永劫供養，長為弟子，昔居寒山，時來茲地。

稽首文殊，寒山之士，南無普賢，捨得定是。

聊申讚歎，願超生死。

# 寒山詩

○凡讀我詩者，心中須護淨。慳貪繼日廉，詔曲登時正。  
驅遣除惡業，歸依受真性。今日得佛身，急急如律令。  
○重巖我卜居，鳥道絕人跡。庭際何所有，白雲抱幽石。  
住茲凡幾年，屢見春冬易。寄語鐘鼎家，虛名定無益。  
○可笑寒山道，而無車馬蹤。聯谿難記曲，疊嶂不知重。  
泣露千般草，吟風一樣松。此時迷徑處，形問影何從。  
○吾家好隱淪，居處絕囂塵。踐草成三徑，瞻雲作四鄰。  
助歌聲有鳥，問法語無人。今日婆婆樹，幾年爲一春。  
○琴書須自隨，祿位用何爲。投輦從賢婦，巾車有孝兒。  
風吹曝麥地，水溢沃魚池。常念鷁鶴鳥，安身在一枝。

◎ 弟兄同五郡，父子本三州。欲驗飛鳬集，須旌白兔遊。  
靈瓜夢裏受，神橘座中收。鄉國何迢遞，同魚寄水流。

◎ 一爲書劍客，二遇聖明君。東守文不賞，西征武不勲。  
學文兼學武，學武兼學文。今日既老矣，餘何不足云。

◎ 莊子說送終，天地爲棺槨。吾歸此有時，唯須一番箔。  
死將餒青蠅，吊不勞白鶴。餓著首陽山，生廉死亦樂。

◎ 人問寒山道，寒山路不通。夏天冰未釋，日出霧朦朧。  
似我何由屆，與君心不同。君心若似我，還得到其中。

◎ 天生百尺樹，翦作長條木。可惜棟梁材，拋之在幽谷。  
年多心尚勁，日久皮漸禿。識者取將來，猶堪柱馬屋。

◎ 驅馬度荒城，荒城動客情。高低舊雉堞，大小古墳塋。  
自振孤蓬影，長凝拱木聲。所嗟皆俗骨，仙史更無名。

○鸚鵡宅西國，虞羅捕得歸。美人朝夕弄，出入在庭幃。  
賜以金籠貯，局哉損羽衣。不如鴻與鶴，飄颻入雲飛。

○玉堂掛珠廉，中有嬪娟子。其貌勝神仙，容華若桃李。  
東家春霧合，西舍秋風起。更過三十年，還成甘蔗滓。

○城中娥眉女，珠珮珂珊珊。鸚鵡花前弄，琵琶月下彈。  
長歌三月響，短舞萬人看。未必長如此，芙蓉不耐寒。

○父母續經多，田園不羨他。婦搖機軋軋，兒弄口囁囁。  
拍手催花舞，擣頭聽鳥歌。誰當來歎賀，樵客屢經過。

○家住綠巖下，庭蕪更不芟。新藤垂繚繞，古石豎巉巖。  
山果獮猴摘，池魚白鷺銜。仙書一兩卷，樹下讀喃喃。

○四時無止息，年去又年來。萬物有代謝，九天無朽摧。  
東明又西暗，花落復花開。唯有黃泉客，冥冥去不迴。

- ◎ 歲去換愁年，春來物色鮮。山花笑渌水，巖岫舞青煙。  
蜂蝶自云樂，禽魚更可憐。朋遊情未已，徹曉不能眠。
- ◎ 手筆大縱橫，身才極瓊瑋。生爲有限身，死作無名鬼。  
自古如此多，君今爭奈何。可來白雲裏，教爾紫芝歌。
- ◎ 欲得安身處，寒山可長保。微風吹幽松，近聽聲逾好。  
下有斑白人，喃喃讀黃老。十年歸不得，忘卻來時道。
- ◎ 俊傑馬上郎，揮鞭指柳楊。謂言無死日，終不作梯航。  
四運花自好，一朝成萎黃。醍醐與石蜜，至死不能嘗。
- ◎ 有一餐霞子，其居諱俗遊。論時實蕭爽，在夏亦如秋。  
幽澗常瀝瀝，高松風颶颶。其中半日坐，忘卻百年愁。
- ◎ 妾在邯鄲住，歌聲亦抑揚。賴我安居處，此曲舊來長。  
既醉莫言歸，留連日未央。兒家寢宿處，繡被滿銀床。

○快榜三翼舟，善乘千里馬。莫能造我家，謂言最幽野。  
巖岫深嶂中，雲雷竟日下。自非孔丘公，無能相救者。  
○智者君拋我，愚者我拋君。非愚亦非智，從此斷相聞。  
入夜歌明月，侵晨舞白雲。焉能拱口手，端坐鬢紛紛。  
○有鳥五色彫，棲桐食竹實。徐動合禮儀，和鳴中音律。  
昨來何以至，爲吾暫時出。儻聞絃歌聲，作舞欣今日。  
○茅棟野人居，門前車馬疏。林幽偏聚鳥，谿闊本藏魚。  
山果攜兒摘，臯田共婦鋤。家中何所有，唯有一牀書。  
○登陟寒山道，寒山路不窮。谿長石磊磊，澗闊草蒙蒙。  
苔滑非關雨，松鳴不假風。誰能超世累，共坐白雲中。  
○六極常嬰困，九維徒自論。有才遺草澤，無藝閑蓬門。  
日上巖猶暗，煙消谷裏昏。其中長者子，箇箇總無禪。

○白雲高嵯峨，渌水蕩潭波。此處聞漁父，時時鼓棹歌。  
聲聲不可聽，令我愁思多。誰謂雀無角，其如穿屋何。。。

○杳杳寒山道，落落冷澗濱。啾啾常有鳥，寂寂更無人。  
磧磧風吹面，紛紛雪積身。朝朝不見日，歲歲不知春。。

○少年何所愁，愁見鬢毛白。白更何所愁，愁見日逼迫。  
移向東岱居，配守北邙宅。何忍出此言，此言傷老客。。

○聞道愁難遣，斯言謂不真。昨朝曾趁卻，今日又纏身。  
月盡愁難盡，年新愁更新。誰知席帽下，元是昔愁人。。

○兩龜乘犢車，驀出路頭戲。一轡從傍來，苦死欲求寄。  
不載爽人情，始載被沉累。彈指不可論，行恩郤遭刺。。。

○三月蠶猶小，女人來采花。隈牆弄蝴蝶，臨水擲蝦蟆。  
羅袖盛梅子，金鎰挑筍芽。鬥論多物色，此地勝余家。。。

◎ 東家一老婆，富來三五年。昔日貧於我，今笑我無錢。  
渠笑我在後，我笑渠在前。相笑儻不止，東邊復西邊。

◎ 富兒多鞅掌，觸事難祗承。倉米已赫赤，不貸人斗升。  
轉懷鉤距意，買絹先揀綾。若至臨終日，弔客有蒼蠅。  
◎ 余曾昔睹聰明士，博達英靈無比倫。一選嘉名喧宇宙，  
五言詩句越諸人。爲官治化超先輩，直爲無能繼後塵。  
忽然富貴貪財色，瓦解冰消不可陳。

◎ 白鶴銜苦桃，千里作一息。欲往蓬萊山，將此充糧食。  
未達毛摧落，離群心慘惄。卻歸舊來巢，妻子不相識。  
◎ 憷居幽隱處，乍向國清眾。時訪豐干道，仍來看拾公。  
獨迴上寒巖，無人話合同。尋究無源水，源窮水不窮。  
◎ 生前大愚癡，不爲今日悟。今日如許貧，總是前生作。

今日又不修，來生還如故。兩岸各無船，渺渺難濟渡。

○ 環環盧家女，舊來名莫愁。貪乘摘花馬，樂撈采蓮舟。  
膝坐綠熊席，身披青鳳裘。衰傷百年內，不免歸山丘。

○ 低眼鄒公妻，邯鄲杜生母。二人同老少，一種好面首。  
昨日會客場，惡衣排在後。只爲著破裙，喫他殘麪餳。

○ 獨臥重巖下，蒸雲晝不消。室中雖踰蠹，心裏絕喧囂。  
夢去遊金闕，魂歸度石橋。拋除鬧我者，歷歷樹間瓢。

○ 夫物有所用，用之各有宜。用之若失所，一缺復一虧。  
圓鑿而方枘，悲哉空爾爲。驛鵠將捕鼠，不及跛貓兒。

○ 誰家長不死，死事舊來均。始憶八尺漢，俄成一聚塵。  
黃泉無曉日，青草有時春。行到傷心處，松風愁殺人。

○ 騦馬珊瑚鞭，驅馳洛陽道。自矜美少年，不信有衰老。  
白髮會應生，紅顏豈長保。但看北邙山，箇是蓬萊島。

○ 竟日常如醉，流年不暫停。埋著蓬蒿下，曉月何冥冥。  
骨肉消散盡，魂魄幾凋零。遮莫咬鐵口，無因讀老經。

○ 一向寒山坐，淹留三十年。昨來訪親友，太半入黃泉。  
漸減如殘燭，長流似逝川。今朝對孤影，不覺淚雙懸。

○ 相喚採芙蓉，可憐清江裏。游戲不覺暮，屢見狂風起。  
浪捲鴛鴦兒，波搖鸕鷀子。此時居舟楫，浩蕩情無已。

○ 吾心似秋月，碧潭清皎潔。無物堪比倫，教我如何說。

○ 垂柳暗如煙，飛花飄似霰。夫居離婦州，婦住思夫縣。  
各在天一涯，何時得相見。寄語明月樓，莫貯雙飛燕。

- 有酒相招飲，有肉相呼喫。黃泉前後人，少壯須努力。  
玉帶暫時華，金釵非久飾。張翁與鄭婆，一去無消息。
- 可憐好丈夫，身體極稜稜。春秋未三十，才藝百般能。  
金羈逐俠客，玉饌集良朋。唯有一般惡。不傳無盡燈。
- 桃花欲經夏，風月催不待。訪覓漢時人，能無一箇在。  
朝朝花遷落，歲歲人移改。今日揚塵處，昔時爲大海。
- 我見東家女，年可有十八。西舍競來問，願姻夫妻活。  
生烹羊煮眾命，聚頭作姪殺。含笑樂呵呵，啼哭受殃抉。
- 田舍多桑園，牛犢滿廄轍。肯信有因果，頑皮早晚裂。  
眼看消磨盡，當頭各自活。紙褲瓦作襪，到頭凍餓殺。
- 我見百十狗，箇箇毛<sub>生</sub>鬚<sub>三</sub>鬚<sub>二</sub>。臥者渠自臥，行者渠自行。  
投之一塊骨，相與嘔喋爭。良由爲骨少，狗多分不平。

○極目兮長望，白雲四茫茫。鷗鴟飽脹脰，鸞鳳飢彷徨。  
駿馬放石磧，蹇驢能至堂。天高不可問，鶯鶯在滄浪。

○洛陽多女兒，春日逞華麗。共折路邊花，各持插高髻。  
髻高花匼匝ㄐㄝˊㄗㄚˊ，人見皆睥睨。別求摻摻憐，將歸見夫婿。

○春女銜容儀，相將南陌陲。看花愁日晚，隱樹怕風吹。  
年少從傍來，白馬黃金羈。何須久相弄，兒家夫婿知。

○群女戲夕陽，風來滿路香。綴裙金蛱蝶，插髻玉鴛鴦。  
角婢紅羅縫，闊奴紫錦裳。爲觀失道者，鬢白心惶惶。

○若人逢鬼魅。第一莫驚懼。捺硬莫采渠，呼名自當去。  
燒香請佛力，禮拜求僧助。蚊子叮鐵牛，無渠下嘴處。

○浩浩黃河水，東流長不息。悠悠不見清，人人壽有極。  
苟欲乘白雲，曷由生羽翼。唯當鬢髮時，行住須努力。

○乘茲朽木船，采彼紅婆子。

(注)

行至大海中，波濤復不止。

○唯齋一宿糧。去岸三千里。煩惱從何生，愁哉緣苦起。

※注：紅音壬。佛經西國苦樹名，其子根枝俱苦，喻眾生之惡。

○默默永無言，後生何所述。隱居在林藪，智日何由出。  
枯槁非堅衛，風霜成夭疾。土牛耕石田，未有得稻日。

○山中何太冷，自古非今年。沓嶂怕凝雪，幽林每吐煙。  
草生芒種後，葉落立秋前。此有沉迷客，窺窺不見天。

○山客心悄悄，常嗟歲序遷。辛勤采芝朮，披斥詎成仙。  
庭廓雲初卷，林明月正圓。不歸何所爲，桂樹相留連。

○有人坐山楹，雲卷兮霞瓔。秉芳兮欲寄，路漫漫難征。  
心惆悵狐疑，年老已無成。眾嚦咿斯蹇，獨立兮忠貞。  
○豬喫死人肉，人喫死豬腸。豬不嫌人臭，人返道豬香。

○ 豬死拋水內，人死掘土藏。彼此莫相噉，蓮花生沸湯。

○ 快哉混沌身，不飯復不尿。遭得誰鑽鑿，因茲立九竅。

朝朝爲衣食，歲歲愁租調。千箇爭一錢，聚頭亡命叫。

○ 啼哭緣何事，淚如珠子顆。應當有別離，復是遭喪禍。

所爲在貧窮，未能了因果。塚間瞻死屍，六道不干我。

○ 婦女慵經織，男夫懶耨田。輕浮耽挾彈，乞丐跕躡拈抹絃。

凍骨衣應急，充腸食在先。今誰念於汝，苦痛哭蒼天。

○ 不行真正道，隨邪號行婆。口慚神佛少，心懷嫉妒多。

背後喧魚肉，人前念佛陀。如此修身處，難應避奈何。

○ 世有一等愚，茫茫恰似驢。還解人言語，貪姪狀若豬。

險巇難可測，實語卻成虛。誰能共伊語，令教莫此居。

○ 有漢姓傲慢，名貪字不廉。一身無所解，百事被他嫌。

死惡黃連苦，生憐白蜜甜。喫魚猶未止，食肉更無厭。  
○縱你居犀角，饒君帶虎睛。桃枝將辟穢，蒜殼取爲瓔。  
暖腹茱萸酒，空心枸杞羹。終歸不免死，浪自覓長生。  
○卜擇幽居地，天台更莫言。猿啼谿霧冷，嶽色草門連。  
折葉覆松室，開池引澗泉。已甘休萬事，采蕨度殘年。  
○益者益其精，可名爲有益。易者易其形，是名之有易。  
能益復能易，當得上仙籍。無益復無易，終不免死厄。  
○徒勞說三史，浪自看五經。洎老檢黃籍，依前住白丁。  
筮遭連蹇卦，生主虛危星。不及河邊樹，年年一度青。  
○碧澗泉水清，寒山月華白。默知神自明，觀空境逾寂。  
○我今有一襦，非羅復非綺。借問作何色，不紅亦不紫。  
夏天將作衫，冬天將作被。冬夏遞互用，長年只這是。

○白拂栴檀柄，馨香竟日聞。柔和如卷霧，搖拽似行雲。  
禮奉宜當暑，高提復去塵。時時方丈內，將用指迷人。

○貪愛有人求快活，不知禍在百年身。但看陽燄浮漚水，  
便覺無常敗壞人。丈夫志氣直如鐵，無曲心中道自真。  
行密節高霜下竹，方知不枉用心神。

○多少般數人，百計求名利。心貪覓榮華，經營圖富貴。  
心未片時歇，奔突如煙氣。家眷實團圓，一呼百諾至。  
不過七十年，冰消瓦解置。死了萬事休，誰人承後嗣。  
水浸泥彈丸，方知無意智。

○貪人好聚財，恰如梟愛子。子大而食母，財多還害己。  
散之即福生，聚之即禍起。無財亦無禍，鼓翼青雲裏。  
○去家一萬里，提劍擊匈奴。得利渠即死，失利汝即殂。

渠命既不惜，汝命有何幸。教汝百勝術，不貪爲上謀。  
○瞋是心中火，能燒功德林，欲行菩薩道，忍辱護真心。  
○汝爲埋頭癡兀兀，愛向無明羅刹窟。再三勸你早修行，  
是你頑癡心恍惚。不肯信受寒山語，轉轉倍加業汨汨。  
直待斬首作兩段，方知自身奴賊物。

○惡趣甚茫茫，冥冥無日光。人間八百歲，未抵半宵長。  
此等諸癡子，論情甚可傷。勸居求出離，認取法中王。  
○世有多解人，愚癡徒苦辛。不求當來善，唯知造惡因。  
五逆十惡輩，三毒以爲親。一死入地獄，長如鎮庫銀。  
○天高高不窮，地厚厚無極。動物在其中，憑茲造化力。  
爭頭覓飽暖，作計相噉食。因果都未詳，盲兒問乳色。  
○天下幾種人，論時色數有。賈婆如許夫，黃老元無婦。

衛氏兒可憐，鐘家女極醜。渠若向西行，我便東邊走。

○ 賢士不貪婪，癡人好鑪治。麥地占他家，竹園皆我者。

○ 噴噴買魚肉，擔歸餒妻子。何須殺他命，將來活汝已。  
此非天堂緣，純是地獄滓。徐六語破堆，始知沒道理。

○ 有人把椿樹，喚作白栴檀。學道多沙數，幾箇得泥丸。  
棄金卻擔草，謾他亦自謾。似聚砂一處，成團也大難。

○ 蒸砂擬作飯，臨渴始掘井。用力磨碌磚，那堪將作鏡。  
佛說元平等，總有真如性。但自審思量，不用閑爭競。

○ 推尋世間事，子細總皆知。凡事莫容易，盡愛討便宜。  
護即弊成好，毀即是成非。故知雜濫口，背面總由伊。  
冷暖我自量，不信奴脣皮。

○蹭蹬諸貧士，飢寒成至極。閑居好作詩，札札用心力。  
賤他言孰采，勸君休歎息。題安餽餅上，乞狗也不喫。  
○欲識生死譬，且將冰水比。水結即成冰，冰消返成水。  
已死必應生，出生還復死。冰水不相傷，生死還雙美。  
○尋思少年日，遊獵向平陵。國使職非願，神仙未足稱。  
聯翩騎白馬，喝兔放蒼鷹。不覺大流落，皤皤誰見矜。  
○偃息深林下，從生是農夫。立身既質直，出語無諂諛。  
保我不鑒璧，信君方得珠。焉能同汎濫，極目波上鳧。  
○不須攻人惡，何用伐己善。行之則可行，卷之則可卷。  
祿厚憂積大，言深慮交淺。聞茲若念茲，小子當自見。  
○富兒會高堂，華燈何煒煌。此時無燭者，心願處其傍。  
不意遭排遣，還歸暗處藏。益人明詎損，頓訝惜餘光。

○世有聰明士，勤苦探幽文。三端自孤立，六藝越諸君。  
神氣卓然異，精彩超眾群。不識箇中意，逐境亂紛紛。

○層層山水秀，煙霞鎖翠微。嵐拂紗巾濕，露霑蓑草衣。  
足躡遊方履，手執古藤枝。更觀塵世外，夢境復何爲。

○滿卷才子詩，溢壺聖人酒。行愛觀牛犢，坐不離左右。  
霜露入茅簷，月華明甕牖。此時吸兩甌，吟詩五百首。

○施家有兩兒，以藝干齊楚。文武各自備，託身爲得所。  
孟公問其術，我子親教汝。秦衛兩不成，失時成齟齬。

○止宿鴛鴦鳥，一雄兼一雌。銜花相共食，刷羽每相隨。  
戲入煙霄裏，宿歸沙岸湄。自憐生處樂，不奪鳳凰池。  
○或有銜行人，才藝過周孔。見罷頭兀兀，看時身侗侗。  
繩牽未肯行，錐刺猶不動。恰似羊公鶴，可憐生麁麁。

- 少小帶經鋤，本將兄共居。緣遭他輩責，剩被自妻疏。  
拋絕紅塵境，常遊好閱書。誰能借斗水，活取轍中魚。
- 變化計無窮，生死竟不止。三途鳥雀身，五嶽龍魚已。  
世濁作躬躬襦，時清爲驥駢。前迴是富兒，今度成貧士。
- 書判全非弱，嫌身不得官。銓曹被拗折，洗垢覓瘡瘢。  
必也關天命，今冬更試看。盲兒射雀目，偶中亦非難。
- 貧驢欠一尺，富狗剩三寸。若分貧不平，中半富與困。  
始取驢飽足，卻令狗飢頓。爲汝熟思量，令我也愁悶。
- 柳郎八十二，藍嫂一十八。夫妻共百年，相憐情狡猾。  
弄璋字烏鵲，擲瓦名婠婠。屢見枯楊蕪，常遭青女殺。
- 大有飢寒客，生將獸魚殊。長存磨石下，時哭路邊隅。  
累日空思飯，經冬不識襦。唯齎一束草，並帶五升麩。

○赫赫誰齕肆，其酒甚濃厚。可憐高幡幟，極目平升斗。  
何意訝不售，其家多猛狗。童子欲來沽，狗咬便是走。

○吁嗟濁濫處，羅刹共賢人。謂是等流類，焉知道不親。  
狐假獅子勢，詐妄卻稱珍。鉛礦入鑪冶，方知金不真。

○田家避暑月，斗酒共誰歡。雜雜排山果，疏疏圍酒罇。  
蘆蓆將代席，蕉葉且充盤。醉後揩頤坐，須彌小彈丸。

○箇是何措大，時來省南院。年可三十餘，曾經四五選。  
囊裏無青蚨，篋中有黃絹。行到食店前，不敢暫迴面。  
○爲人常喫用，愛意須惺惜。老去不自由，漸被他推斥。  
送向荒山頭，一生願虛擲。亡羊罷補穿，失意終無極。

○浪造凌霄閣，虛登百尺樓。養生仍天命，誘讀詎封侯。  
不用從黃口，何須厭白頭。未能端似箭，且莫曲如鈎。

○雲山疊疊連天碧，路僻林深無客遊。遠望孤蟾明皎皎，  
近聞群鳥語啾啾。老夫獨坐棲青嶂，少室閑居任白頭。  
可歎往年與今日，無心還似水東流。

○富貴疏親聚，只爲多錢米。貧賤骨肉離，非關少兄弟。  
急須歸去來，招賢閣未啓。浪行朱雀街，踏破皮鞋底。

○我見一癡漢，仍居三兩婦。養得八九兒，總是隨宜手。  
丁防是新差，資財非舊有。黃蘖作驢鞚，始知苦在後。  
○新穀尚未熟，舊穀今已無。就貸一斗許，門外立踟躕。  
夫出教問婦，婦出遣問夫。慳惜不救乏，財多爲累愚。

○大有好笑事，略陳三五箇。張公富奢華，孟子貧轆軻。  
只取侏儒飽，不憐方朔餓。巴歌唱者多，白雪無人和。  
○老翁娶少婦，髮白婦不耐。老婆嫁少夫，面黃夫不愛。

老翁娶老婆，一一無棄背。少婦嫁少夫，兩兩相憐態。

○雍容美少年，博覽諸經史。盡號曰先生，皆稱爲學士。未能得官職，不解秉耒耜。冬披破布衫，蓋是書誤已。

○鳥語情不堪，其時臥草庵。櫻桃紅爍爍，楊柳正毵毵。旭日銜青嶂，晴雲洗渌潭。誰知出塵俗，馭上寒山南。

○昨日何悠悠，場中可憐許。上爲桃李徑，下作蘭蓀渚。復有綺羅人，舍中翠羽毛。相逢欲相喚，脈脈不能語。

○丈夫莫守困，無錢須經紀。養得一犧牛，生得五犢子。犢子又生兒，積數無窮已。寄語陶朱公，富與君相似。

○之子何惶惶，卜居須自審。南方瘴癘多，北地風霜甚。荒陬不可居，毒川難可飲。魂兮歸去來，食我家園葚。

○昨夜夢還家，見婦機中織。駐梭如有思，擎梭似無力。

呼之迴面視，況復不相識。應是別多年，鬢毛非舊色。  
○人生不滿百，常懷千載憂。自身病始可，又爲子孫愁。  
下視禾根下，上看桑樹頭。秤鉗落東海，到底始知休。  
○世有一等流，悠悠似木頭。出語無知解，云我百不憂。  
問道道不會，問佛佛不求。子細推尋著，茫然一場愁。  
○董郎年少時，出入帝京裏。衫作嫩鵝黃，容儀畫相似。  
常騎踏雪馬，拂拂紅塵起。觀者滿路傍，箇是誰家子。  
○箇是誰家子，爲人大被憎。癡心常憤憤，肉眼醉瞢瞢。  
見佛不禮佛，逢僧不施僧。唯知打大鑿，除此百無能。  
○人以身爲本，本以心爲柄。本在心莫邪，心邪喪本命。  
未能免此殃，何言懶照鏡。不念金剛經，卻令菩薩病。  
○城北仲家翁，渠家多酒肉。仲翁婦死時，弔客滿堂屋。

仲翁自身亡，能無一人哭。喫他盃饗者，何太冷心腹。

○下愚讀我詩，不解卻嗤诮。中庸讀我詩，思量云甚要。  
上賢讀我詩，把著滿面笑。楊脩見幼婦，一覽便知妙。

○自有慳惜人，我非慳惜輩。衣單爲舞穿，洒盡緣歌啐。  
當取一腹飽，莫令兩腳餒。蓬蒿鑽髑髏，此日君應悔。

○我行經古墳，淚盡嗟存沒。塚破壓黃腸，棺穿露白骨。  
欹斜有甕缾，振撥無簪笏。風至攬其中，灰塵亂竚竚。  
○夕陽赫西山，草木光曠曠。復有朦朧處，松蘿相連接。  
此中多伏虎，見我奮迅鬪，手中無寸刃，爭不懼懾懾。  
○出身既擾擾，世事非一狀。未能捨流俗，所以相追訪。  
昨弔徐五死，今送劉三葬。終日不得閑，爲此心悽愴。  
○有樂且須樂，時哉不可失。雖云一百年，豈滿三萬日。

寄世是須臾，論錢莫啾唧。孝經末後章，委曲陳情畢。  
○獨坐常忽忽，情懷何悠悠。山腰雲漫漫，谷口風颼颼。  
猿來樹嫋嫋，鳥入林啾啾。時催鬢颯颯，歲盡老惆悵。  
○一人好頭肚，六藝盡皆通。南見驅歸北，西逢趨向東。  
長漂如汎萍，不息似飛蓬。問是何等色，姓貧名曰窮。  
○他賢君即受，不賢君莫與。君賢他見容，不賢他亦拒。  
嘉善矜不能，仁徒方得所。勸逐子張言，拋卻卜商語。  
○俗薄真成簿，人心箇不同。殷翁笑柳老，柳老笑殷翁。  
何故兩相笑，俱行譏<sup>譏</sup>詬中。裝車競嶺峴，翻載各瀧凍。  
○是我有錢日，怕爲汝貸將。汝今既飽暖，見我不分張。  
須憶汝欲得，似我今承望。有無更代事，勸汝熟思量。  
○人生一百年，佛說十二部。慈悲如野鹿，瞋忿似家狗。

家狗趁不去，野鹿常好走。欲伏獮猴心，須聽獅子吼。

○教汝數般事，思量知我賢。極貧忍賣屋，纔富須買田。  
空腹不得走，枕頭須莫眠。此言期眾見，掛在日東邊。

○寒山多幽奇，登者皆怕懾。月照水澄澄，風吹草獵獵。  
凋梅雪作花，杌木雲充葉。觸雨轉鮮靈，非晴不可涉。

○有樹先林生，計年逾一倍。根遭陵谷變，葉被風霜改。  
咸笑外凋零，不憐內紋綵。皮膚脱落盡，唯有貞實在。

○寒山有裸蟲，身白而頭黑。手把兩卷書，一道將一德。  
住不安釜竈，行不齋衣祫。常持智慧劍，擬破煩惱賊。

○有人畏白首，不肯捨朱紱。Ex采藥空求仙，根苗亂挑掘。  
數年無效驗，癡意瞋佛鬱。獵師披袈裟，元非汝使物。

○昔時可可貧，今朝最貧凍。作事不諧和，觸途成倥偬。  
行泥屢腳屈，坐社頻腹痛。失卻斑貓兒，老鼠圍飯甕。  
○我見世間人，堂堂好儀相。不報父母恩，方寸底摸樣。  
欠負他人錢，蹄穿始惆悵。箇箇惜妻兒，爺嬪不供養。  
兄弟似冤家，心中常悵快。憶昔少年時，求神願成長。  
今爲不孝子，世間多此樣。買肉自家噇，抹嘴道我暢。  
自逞說嘍羅，聰明無益當。牛頭努目瞋，出去始時嚮。  
擇佛燒好香，揀僧歸供養。羅漢門前乞，趁卻閑和尚。  
不悟無爲人，從來無相狀。封疏請名僧，覬錢兩三樣。  
雲光好法師，安角在頭上。汝無平等心，聖賢俱不降。  
凡聖皆混然，勸君休取相。我法妙難思，天龍盡迴向。  
我今稽首禮，無上法中王。慈悲大喜捨，名稱滿十方。  
眾生作依怙，智慧身金剛。頂禮無所著，我師大法王。

○可貴天然物，獨一無伴侶。覓他不可見，出入無門戶。  
促之在方寸，延之一切處。你若不信受，相逢不相遇。。。

○余家有一窟，窟中無一物。淨潔空堂堂，光華明日日。  
蔬食養微軀，布裘遮幻質。任你千聖現，我有天真佛。  
○男兒大丈夫，作事莫莽齒。勁挺鐵石心，直取菩提路。  
邪路不用行，行之枉辛苦。不要求佛果，識取心王主。。  
○粵自居寒山，曾經幾萬載。任運遯林泉，棲遲觀自在。  
寒巖人不到，白雲常靉靆。細草作臥褥，青天爲被蓋。  
快活枕石頭，天地任變改。。

○可重是寒山，白雲常自閑。猿啼暢道內，虎嘯出人間。  
獨步石可履，孤吟藤好攀。松風清颯颯，鳥語聲咷咷。。  
○閑自訪高僧，煙山萬萬層。師親指歸路，月掛一輪燈。。

○閑遊華頂上，日朗晝光輝。四顧晴空裏，白雲同鶴飛。

○世有多事人，廣學諸知見。不識本真性，與道轉懸遠。  
若能明實相，豈用陳虛願。一念了自心，開佛之知見。

○寒山有一宅，宅中無闌隔。六門左右通，堂中見天碧。

房房虛索索，東壁打西壁。其中一物無，免被人來借。  
寒到燒軟火，飢來煮菜喫。不學田舍翁，廣置牛莊宅。  
盡作地獄業，一入何曾極。好好善思量，思量知軌則。

○儂家暫下山，入到城隍裏。逢見一群女，端正容貌美。  
頭戴蜀樣花，燕脂塗粉膩。金釧鏤銀朵，羅衣緋紅紫。  
朱顏類神仙，香帶氣氤氳。時人皆顧盼，癡愛染心意。  
謂言世無雙，魂影隨他去。狗咬枯骨頭，虛自舐唇齒。  
不解返思量，與畜何曾異。今成白髮婆，老陋若精魅。

無始由狗心，不超解脫地。

○一自遯寒山，養命餐山果。平生何所憂，此世隨緣過。  
日月如逝川，光陰石中火。任你天地移，我暢巖中坐。

○我見世間人，茫茫走路塵。不知此中事，將何爲去津。  
榮華能幾日，眷屬片時親。縱有千斤金，不如林下貧。

○自聞梁朝日，四依諸賢士。寶志萬迴師，四仙傳大士。  
顯揚一代教，作時如來使。建造僧伽藍，信心歸佛理。  
雖乃得如斯，有爲多患累。與道殊懸遠，折西補東爾。  
不達無爲功，損多益少利。有聲而無形，至今何處去。  
○吁嗟貧復病，爲人絕友親。甕裏長無飯，甑中屢生塵。  
蓬庵不免雨，漏榻劣容身。莫怪今憔悴，多愁定損人。  
○養女畏太多，已生須訓誘。捺頭遣小心，鞭背令緘口。

未解乘機杼，那堪事箕箒。張婆語驢駒，汝大不如母。  
○秉志不可卷，須知我匪席。浪造山林中，獨臥盤陀石。  
辯士來勸余，速令受金璧。鑿牆植蓬蒿，若此非有益。  
○以我棲遲處，幽深難可論。無風蘿自動，不霧竹長昏。  
澗水緣誰咽，山雲忽自屯。午時庵內坐，始覺日頭暾。  
○憶昔遇逢處，人間逐勝遊。樂山登萬仞，愛水汎千舟。  
送客琵琶谷，攜琴鸚鵡洲。焉知松樹下，抱膝冷颼颼。  
○報汝修道者，進求虛勞神。人有精靈物，無字復無文。  
呼時歷歷應，隱處不居存。叮嚀善保護，勿令有點痕。  
○去年春鳥鳴，此時思弟兄。今年秋菊爛，此時思發生。  
渌水千場咽，黃雲四面平。哀哉百年內，腸斷憶咸京。  
○多少天台人，不識寒山子。莫知真意度，喚作閑言語。

○一住寒山萬事休，更無雜念掛心頭。閑書石壁題詩句，任運還同不繫舟。

○可惜百年屋，左倒右復傾。牆壁分散盡，木植亂差橫。  
磚瓦片片落，朽爛不堪停。狂風吹簷榻，再豎卒難成。

○精神殊爽爽，形貌極堂堂。能射穿七札，讀書覽五行。  
經眠虎頭枕，昔坐象牙床。若無一堵物，不啻冷如霜。

○笑我田舍兒，頭頰底紮濛。巾子未曾高，腰帶長時急。  
非是不及時，無錢趁不及。一日有錢財，浮圖頂上立。

○買肉血漚漚，買魚跳鰻鰻。各君身招罪累，妻子成快活。  
纔死渠便嫁，他人誰敢遏。一朝如破床，兩箇當頭脫。  
○客難寒山子，君詩無道理。吾觀乎古人，貧賤不爲恥。  
應之笑此言，談何疏闊矣。願君似今日，錢是急事爾。

○從生不往來，至死無仁義。言既有枝葉，心懷便險詖。  
若其開小道，緣此生大僞。詐說造雲梯，削之成棘刺。  
○一缢鑄金成，一缢埏泥出。二缢任君看，那箇缢牢實。  
欲知缢有二，須知業非一。將此驗生因，修行在今日。  
○摧殘荒草廬，其中煙火蔚。借問群小兒，生來凡幾日。  
門外有三車，迎之不肯出。飽食腹膨脹，箇是癡頑物。  
○有身與無身，是我復非我。如此審思量，遷延倚巖坐。  
足間青草生，頂上紅塵墮。已見俗中人，靈床施酒果。  
○昨見河邊樹，摧殘不可論。二三餘幹在，千萬斧刀痕。  
霜凋萎疏葉，波衝枯朽根。生處當如此，何用怨乾坤。  
○余見僧繇性希奇，巧妙間生梁朝時。道子飄然爲殊特，  
二公善繪手毫揮。逞畫圖真意氣異，龍行鬼走神巍巍。

饒邈虛空寫塵跡，無因畫得志公師。

○久住寒山凡幾秋，獨吟歌曲絕無憂。蓬扉不掩常幽寂，  
泉涌甘漿長自流。石室地鑪砂鼎沸，松黃柏茗乳香甌。  
飢餐一粒伽陀藥，心地調和倚石頭。

○丹丘迥聳與雲齊，空裡五峰遙望低。雁塔高排出青嶂，  
禪林古殿入虹蜺。風搖松葉赤城秀，霧吐中巖仙路迷。  
碧落千山萬仞現，藤蘿相接次連谿。

○千生萬死凡幾生，生死來去轉迷盲。不識心中無價寶，  
猶似盲驢信腳行。

○老病殘年百有餘，面黃頭白好山居。布裘擁質隨緣過，  
豈羨人間巧樣模。心神用盡爲名利，百種貪婪進己軀。  
浮生幻化如燈燼，塚內埋身是有無。

○世間何事最堪嗟，盡是三途造罪楂。不學白雲巖下客，  
一條寒衲是生芽。秋到任他林落葉，春來從你樹開花。  
三界橫眠閑無事，明月清風是我家。

○昔年曾到大海遊，爲采摩尼誓懇求。直到龍宮深密處，  
金關鎖斷主神愁。龍王守護安耳裏，劍客星揮無處搜。  
賈客卻歸門內去，明珠元在我心頭。

○眾星羅列夜明深，巖點孤燈月未沉。圓滿光華不磨瑩，  
掛在青天是我心。

○千年石上古人蹤，萬丈巖前一點空。明月照時常皎潔，  
不勞尋討問西東。

○寒山頂上月輪孤，照見晴空一物無。可貴天然無價寶，  
埋在五陰溺身軀。

○我向前谿照碧流，或向巖邊坐磐石。心似孤雲無所依，  
悠悠世事何須覓。

○我家本住在寒山，石巖棲息離煩緣。泯時萬象無痕跡，  
舒處周流遍大千。光影騰輝照心地，無有一法當現前。  
方知摩尼一顆珠，解用無方處處圓。

○世人何事可吁嗟，苦樂交煎勿底涯。生死往來多少劫，  
東西南北是誰家。張王李趙權時姓，六道三途事似麻。  
只爲主人不了絕，遂招遷謝逐迷邪。

○余家本住在天台，雲路煙深絕客來。千仞巖巒深可遜，  
萬重谿澗石樓臺。樺巾木屐沿流步，布裘藜杖繞山迴。  
自覺浮生幻化事，逍遙快樂實善哉。

○憐底眾生病，餐嘗略不厭。蒸豚搘蒜醬，炙鴨點椒鹽。

去骨鮮魚膾，兼皮熟肉臉。不知他命苦，只取自家甜。  
○讀書豈免死，讀書豈免貧。何以好識字，識字勝他人。  
丈夫不識字，無處可安身。黃連搣蒜醬，忘計是苦辛。  
○我見瞞人漢，如籃盛水走，一氣將歸家，籃裏何曾有。  
我見被人瞞，一似園中韭。日日被刀傷，天生還自有。  
○不見朝垂露，日爍自消除。人身亦如此，閻浮是寄居。  
切莫因循過，且令三毒祛。菩提即煩惱，盡令無有餘。  
○水清澄澄瑩，徹底自然見。心中無一事，水清眾獸現。  
心若不妄起，永劫無改變。若能如是知，是知無背面。  
○自從到此天台境，經今早度幾冬春。山水不移人自老，  
見卻多少後生人。  
○說食終不飽，說衣不免寒。飽喫須是飯，著衣方免寒。

不解審思量，只道求佛難。迴心即是佛，莫向外頭看。

○可畏輪迴苦，往復似翻塵。蟻巡環未息，六道亂紛紛。  
改頭換面孔，不離舊時人。速了黑暗獄，無令心性昏。

○可畏三界輪，念念未曾息。纔始似出頭，又卻遭沉溺。  
假使非非想，蓋緣多福力。爭似識真源，一得即永得。

○昨日遊峰頂，下窺千尺崖。臨危一株樹，風擺兩枝開。  
雨漂即零落，日曬作塵埃。嗟見此茂秀，今爲一聚灰。

○自古多少聖，叮嚀教自信。人根性不等，高下有利鈍。  
真佛不肯認，置功枉受困。不知清淨心，便是法王印。

○我聞天台山，山中有琪樹。永言欲攀之，莫曉石橋路。  
緣此生悲歎，幸居將已慕。今日觀鏡中，颯颯鬢垂素。

○養子不經師，不及都亭鼠。何曾見好人，豈聞長者語。

爲染在薰蕕，應須擇朋侶。五月販鮮魚，莫教人笑汝。  
○徒閉蓬門坐，頻經石火遷。唯聞人作鬼，不見鶴成仙。  
念此那堪說，隨緣須自憐。迴瞻郊郭外，古墓犁爲田。  
○時人見寒山，各謂是風顛。貌不起人目，身唯布裘纏。  
我語他不會，他語我不言。爲報往來者，可來向寒山。  
○自在白雲閑，從來非買山。下危須策杖，上險捉藤攀。  
澗底松常翠，谿邊石自斑。友朋雖阻絕，春至鳥喧喧。  
○我在村中住，眾推無比方。昨日到城下，卻被狗形相。  
或嫌褲太窄，或說衫少長。攀卻鷄子眼，雀兒舞堂堂。  
○死生元有命，富貴本由天。此是古人語，吾今非謬傳。  
聰明好短命，癡騃卻長年。鈍物豐財寶，醒醒漢無錢。  
○國以人爲本，猶如樹因地。地厚樹扶疏，地薄樹憔悴。

不得露其根，枝枯子先墜。決陂以取魚，是取一期利。

○眾生不可說，何意許顛邪。面上兩惡鳥，心中三毒蛇。  
是渠作障礙，使你事煩拏。舉手高彈指，南無佛陀耶。

○自樂平生道，煙蘿石洞間。野情多放曠，長伴白雲閑。  
有路不通世，無心孰可攀。石床孤夜坐，圓月上寒山。

○大海水無邊，魚龍萬萬千。遞互相食噉，冗冗癡肉團。  
爲心不了絕，妄想起如煙。性月澄澄朗，廓爾照無邊。

○自見天台頂，孤高出眾群。風搖松竹韻，目睹海潮頻。  
下望山青際，談玄有白雲。野情便山水，本志慕道倫。

○三五癡後生，作事不真實。未讀十卷書，強把雌黃筆。  
將他儒行篇，喚作賊盜律。脫體似蟬蟲，咬破他書帙。

○心高如山嶽，人我不伏人。解講園陀典，能談三教文。

心中無慚愧，破戒違律文。自言上人法，稱爲第一人。  
愚者皆讚歎，智者撫掌笑。陽燄虛空花，豈得免生老。  
不如百不解，靜坐絕憂惱。

○如許多寶貝，海中乘壞舸。前頭失卻桅，後頭又無柂。  
宛轉任風吹，高低隨浪簸。如何得到岸，努力莫端坐。

○我見凡愚人，多畜資財穀。飲酒食生命，謂言我富足。  
莫知地獄深，唯求上天福。罪業如毗富，豈得免災毒。  
財主忽然死，爭共當頭哭。供僧讀文疏，空是鬼神祿。  
福田一箇無，虛設一群禿。不如早覺悟，莫作黑暗獄。  
狂風不動樹，心真無罪福。寄語冗冗人，叮嚀再三讀。  
○勸你三界子，莫作勿道理。理短被他欺，理長不奈你。  
世間濁濫人，恰似黍粘子。不見無事人，獨脫無能比。  
早須返本源，三界任緣起。清淨入如流，莫飲無明水。

◎ 三界人蠢蠢，六道人茫茫。貪財愛姦欲，心惡若豺狼。  
地獄如箭射，極苦若爲當。兀兀過朝夕，都不別賢良。  
好惡總不識，猶如豬及羊。共語如木石，嫉妒似顛狂。  
不自見己過，如豬在圈臥。不知自償債，卻笑牛牽磨。  
◎ 人生在塵蒙，恰似盆中蟲。終日行遑遑，不離其盆中。  
神仙不可得，煩惱計無窮。歲月如流水，須臾作老翁。  
◎ 寒山出此語，復似顛狂漢。有事對面說，所以足人怨。  
心真出語直，直心無背面。臨死度奈河，誰是嘍囉漢。  
冥冥泉臺路，被業相拘絆。

◎ 我見多知漢，終日用心神。歧路逞嘍囉，欺謾一切人。  
唯作地獄滓，不修正直因。忽然無常至，定知亂紛紛。  
◎ 寄語諸仁者，復以何爲懷。達道見自性，自性即如來。

天眞元具足，修證轉差迴。棄本卻逐末，只守一場猷。

○世有一般人，不惡又不善。不識主人公，隨客處處轉。  
因循過時光，渾是癡肉讐。雖有一靈臺，如同客作漢。

○常聞釋迦佛，先受然燈記。然燈與釋迦，只論前後智。  
前後體非殊，異中無有異。一佛一切佛，心是如來地。

○常聞國大臣，朱紫簪纓祿。富貴百千般，貪榮不知辱。  
奴馬滿宅舍，金銀盈帑屋。癡福暫時扶，埋頭作地獄。

忽死萬事休，男女當頭哭。不知有禍殃，前路何疾速。  
家破冷颼颼，食無一粒粟。凍餓苦悽淒，良由不覺觸。

○上人心猛利，一聞便知妙。中流心清淨，審思云甚要。  
下士鈍暗癡，頑皮最難裂。直得血淋頭，始知自摧滅。  
看取開眼賊，鬧市集人決。死屍棄如塵，此時向誰說。  
○○○○○

男兒大丈夫，一刀兩段截。人面禽獸心，造作何時歇。

○我有六兄弟，就中一箇惡。打伊又不得，罵伊又不著。  
處處無奈何，耽財好姪殺。見好埋頭愛，貪心過羅刹。  
阿爺惡見伊，阿嬢嫌不悅。昨被我捉得，惡罵恣情掣。  
趨向無人處，一一向伊說。汝今須改行，覆車須改轍。  
若也不信受，共汝惡合殺。汝受我調伏，我共汝覓活。  
從此盡和同，如今過菩薩。學業攻鑪冶，鍊盡三山鐵。  
至今靜恬恬，眾人皆讚說。

○昔日極貧苦，夜夜數他寶。今日審思量，自家須營造。  
掘得一寶藏，純是水精珠。大有碧眼胡，密擬買將去。  
余即報渠言，此珠無價數。

○一生慵懶作，憎重只便輕。他家學事業，余持一卷經。

無心裝標軸，來去省人擎。應病則說藥，方便度眾生。  
但自心無事，何處不惺惺。

○我見出家人，不入出家學。欲知真出家，心淨無繩索。  
澄澄孤玄妙，如如無倚託。三界任縱橫，四生不可泊。  
無爲無事人，逍遙實快樂。

○昨到雲霞觀，忽見仙尊士。星冠月帔橫，盡云居山水。  
余問神仙術，云道若爲比。謂言靈無上，妙藥必神祕。  
守死待鶴來，皆道乘魚去。余乃返窮之，推尋勿道理。  
但看箭射空，須臾還墜地。饒你得仙人，恰似守屍鬼。  
心月自精明，萬像何能比。欲知仙丹術，身內元神是。  
莫學黃巾公(注)，握愚自守擬。

※注：巾一云石

○余鄉有一宅，其宅無正主。地生一寸草，水垂一滴露。  
火燒六箇賊，風吹黑雲雨。子細尋本人，布裏真珠爾。

○傳語諸公子，聽說石齊奴。僮僕八百人，水碓三十區。  
舍下養魚鳥，樓上吹笙竽。伸頭臨白刃，癡心爲綠珠。

○何以長惆悵，人生似朝菌。那堪數十年，親舊凋落盡。  
以此思自哀，哀情不可忍。奈何當奈何，託體歸山引。

○鑑縷關前業，莫訶今日身。若言由冢墓，箇是極癡人。  
到頭君作鬼，豈令男女貧。皎然易解事，作麼無精神。

○我見黃河水，凡經幾度清。水流如急箭，人世若浮萍。  
癡屬根本業，無明煩惱阨。輪迴幾許劫，只爲造迷盲。  
○二儀既開闢，人乃居其中。迷汝即吐霧，醒汝即吹風。  
惜汝即富貴，奪汝即貧窮。碌碌群漢子，萬事由天公。

○余勸諸稚子，急離火宅中。三車在門外，載你免飄蓬。  
露地四衢坐，當天萬事空。十方無上下，來去任西東。

若得箇中意，縱橫處處通。

○可歎浮生人，悠悠何日了。朝朝無閑時，年年不覺老。  
總爲求衣食，令心生煩惱。擾擾百年來，去來三惡道。

○時人尋雲路，雲路杳無蹤。山高多險峻，澗闊少玲瓏。  
碧嶂前兼後，白雲西復東。欲知雲路處，雲路在虛空。

○寒山棲隱處，絕得雜人過。時逢林內鳥，相共唱山歌。  
瑞草聯谿谷，老松枕嵯峨。可觀無事客，憩歇在巖阿。

○五嶽俱成粉，須彌一寸山。大海一滴水，吸入在心田。  
生長菩提子，遍蓋天中天。語汝慕道者，慎莫繞十纏。

○無衣自訪覓，莫共狐謀裘。無食自采取，莫共羊謀羞。

借皮兼借肉，懷歎復懷愁。皆緣義失所，衣食常不周。

○自羨山間樂，逍遙無倚託。逐日養殘軀，閑思無所作。  
時披古佛書，往往登石閣。下窺千尺崖，上有雲盤泊。  
寒月冷颼颼，身似孤飛鶴。

○我見轉輪王，千子常圍繞。十善化四天，莊嚴多七寶。

七寶鎮隨身，莊嚴甚妙好。一朝福報盡，猶若棲蘆鳥。  
還作牛領蟲，六趣受業道。況復諸凡夫，無常豈長保。  
生死如旋火，輪迴似麻稻。不解早覺悟，爲人枉虛老。

○平野水寬闊，丹丘連四明。仙都最高秀，群峰聳翠屏。  
遠遠望何極，虎虎勢相迎。獨標海隅外，處處播嘉名。

○可貴一名山，七寶何能比。松月颼颼冷，雲霞片片起。  
五 厥匝幾重山，迴還多少里。谿澗靜澄澄，快活無窮已。

○我見世間人，生而還復死。昨朝猶二八，壯氣胸襟士。  
如今七十過，力困形憔悴。恰似春日花，朝開夜落爾。

○迥聳霄漢外，雲裏路巖嶺。瀑布千丈流，如鋪練一條。  
下有棲心窟，橫安定命橋。雄雄鎮世界，天台名獨超。

○盤陀石上坐，谿澗冷淒淒。靜覩偏嘉麗，虛巖蒙霧迷。  
怡然憩歇處，日斜樹影低。我自觀心地，蓮花生淤泥。

○隱士遁人間，多向山中眠。青蘿疏麓麓，碧澗響聯聯。  
騰騰且安樂，悠悠自清閑。免有染世事，心靜如白蓮。

○寄語食肉漢，食時無逗遛。今生過去種，未來今日修。  
只取今日美，不畏來生憂。老鼠入飯甕，雖飽難出頭。

○自從出家後，漸得養生趣。伸縮四肢全，勤聽六根具。  
褐衣隨春冬，糲食供朝暮。今日懇懃修，願與佛相遇。

○五言五百篇，七字七十九。三字二十一，都來六百首。  
一例書巖石，自誇云好手。若能會我詩，真是如來母。

○世事繞悠悠，貪生早晚休。研盡大地石，何時得歇頭。  
四時周變易，八節急如流。爲報火宅主，露地騎白牛。

○可笑五陰窟，四蛇同共居。黑暗無明燭，三毒遞相驅。  
伴黨六箇賊，劫掠法財珠。斬卻魔軍輩，安泰湛如蘇。

○常聞漢武帝，爰及秦始皇。俱好神仙術，延年竟不長。  
金臺既摧折，沙丘遂滅亡。茂陵與驪嶽，今日草茫茫。

○憶得二十年，徐步國清歸。國清寺中人，盡道寒山癡。  
癡人何用疑，疑不解尋思。我尚自不識，是伊爭得知。  
低頭不用問，問得復何爲。有人來罵我，分明了了知。  
雖然不應對，卻是得便宜。

○語你出家輩，何名爲出家。奢華求養活，繼綴族姓家。  
美舌甜脣嘴，諂曲心鉤加。終日禮道場，持經置功課。  
鑪燒神佛香，打鐘高聲和。六時學客眷，晝夜不得臥。  
只爲愛錢財，心中不脫灑。見他高道人，卻嫌誹謗罵。  
驢屎比麝香，苦哉佛陀耶。又見出家兒，有力及無力。  
上上高節者，鬼神欽道德。君王分輦坐，諸侯拜迎逆。  
堪爲世福田，世人須保惜。下下低愚者，詐現多求覓。  
濁濫即可知，愚癡愛財色。著卻福田衣，種田討衣食。  
作債稅牛犁，爲事不忠直。朝朝行弊惡，往往痛臂脊。  
不解善思量，地獄苦無極。一朝著病纏，三年臥床席。  
亦有真佛性，翻作無明賊。南無佛陀耶，遠遠求彌勒。  
○寒巖深更好，無人行此道。白雲高岫閑，青嶂孤猿嘯。  
我更何所親，暢志自宜老。形容寒暑遷，心珠甚可保。

○巖前獨靜坐，圓月當天耀。萬象影現中，一輪本無照。  
廓然神自清，含虛洞玄妙。因指見其月，月是心樞要。

○本志慕道倫，道倫常獲親。時逢杜源客，每接話禪賓。  
談玄月明夜，探理日臨晨。萬機俱泯跡，方識本來人。

○元非隱逸士，自號山林人。仕魯蒙幘帛，且愛裹疏巾。  
道有巢許操，恥爲堯舜臣。獮猴罩帽子，學人避風塵。

○自古諸哲人，不見有長存。生而還復死，盡變作灰塵。  
積骨如毗富，別淚成海津。唯有空名在，豈免生死輪。

○今日巖前坐，坐久煙雲收。一道清谿冷，千尋碧嶂頭。  
白雲朝影靜，明月夜光浮。身上無塵垢，心中那更憂。

○千雲萬水間，中有一閑士。白日遊青山，夜歸巖下睡。  
倏爾過春秋，寂然無塵累。快哉何所依，靜若秋江水。

○勸你休去來，莫惱他閻老。失腳入三途，粉骨遭千擣。  
長爲地獄人，永隔今生道。勉你信余言，識取衣中寶。  
○世間一等流，誠堪與人笑。出家弊己身，誑俗將爲道。  
雖著離塵衣，衣中多養蚤。不如歸去來，識取心王好。  
○高高峰頂上，四顧極無邊。獨坐無人知，孤月照寒泉。  
泉中且無月，月自在青天。吟此一曲歌，歌終不是禪。  
○有箇王秀才，笑我詩多失。云不識蜂腰，仍不會鶴膝。  
平側不解壓，凡言取次出，我笑你作詩，如盲徒詠日。  
○我住在村鄉，無爺亦無娘。無名無姓第，人喚作張王。  
並無人教我，貧賤也尋常。自憐心的實，堅固等金剛。  
○寒山出此語，此語無人信。蜜甜足人嘗，黃蘖苦難近。  
順情生喜悅，逆意多瞋恨。但看木部逕，弄了一場困。

○我見人轉經，依他言語會。口轉心不轉，心口相違背。  
心真無委曲，不作諸纏蓋。但且自省躬，莫覓他替代。  
可中作得主，是知無内外。

○寒山唯白雲，寂寂絕埃塵。草座山家有，孤燈明月輪。  
石床臨碧沼，虎鹿每爲鄰。自羨幽居樂，長爲象外人。

○鹿生深林中，飲水而食草。伸腳樹下眠，可憐無煩惱。  
繫之在華堂，餚膳極肥好。終日不肯嘗，形容轉枯槁。

○花上黃鸝子，咷咷聲可憐。美人顏似玉，對此弄鳴絃。  
翫之能不足，眷戀在韶年。花飛鳥亦散，灑淚秋風前。

○棲遲寒巖下，偏訝最幽奇。攜籃采山茹。挈籠摘果歸。  
蔬齋敷茅坐，啜啄食紫芝。清沼濯瓢鉢，雜和煮稠稀。  
當陽擁裘坐，閑讀古人詩。

- 昔日經行處，今復七十年。故人無來往，埋在古冢間。  
○余今頭已白，猶守片雲山。爲報後來子，何不讀古言。  
○欲向東巖去，于今無量年。昨來攀葛上，半路困風煙。  
徑窄衣難進，苔粘履不前。住茲丹桂下，且枕白雲眠。  
○我見利智人，觀者便知意。不假尋文字，直入如來地。  
心不逐諸緣，意根不妄起。心意不生時，內外無餘事。  
○身著空花衣，足躡龜毛履。手把兔角弓，擬射無明鬼。  
○君看葉裏花，能得幾時好。今日畏人攀，明朝待誰掃。  
可憐嬌豔情，年多轉成老。將世比於花，紅顏豈長保。  
○桂棟非吾宅，松林是我家。一生俄爾過，萬事莫言賒。  
濟渡不造筏，漂淪爲采花。善根今未種，何日見生芽。  
○出生三十年，當遊千萬里。行江青草合，入塞紅塵起。

鍊藥空求仙，讀書兼詠史。今日歸寒山，枕流兼洗耳。

○寒山無漏巖，其巖甚濟要。八風吹不動，萬古人傳妙。  
寂寂好安居，空空離譏诮。孤月夜長明，圓日常來照。  
虎丘兼虎谿，不用相呼召。世間有王傅，莫把同周邵。  
我自遜寒巖，快活長歌笑。

○沙門不持戒，道士不服藥。自古多少賢，盡在青山腳。

○有人笑我詩，我詩合典雅。不煩鄭氏箋，豈用毛公解。  
不恨會人稀，只爲知音寡。若遣趁官商，余病莫能罷。  
忽遇明眼人，即自流天下。

## 三字詩六首

○寒山道，無人到。若能行，稱十號。有蟬鳴，無鶲噪。  
黃葉落，白雲掃。石磊磊，山隩隩。我獨居，名善導。  
仔細看，何相好。

○寒山寒，冰鎖石。藏山青，現雪白。日出照，一時釋。  
從茲暖，養老客。

○我居山，勿人識。白雲中，常寂寂。

○寒山深，稱我心。純白石，勿黃金。泉聲響，撫伯琴。  
有子期，辨此音。

○重巖中，足清風。扇不搖，涼冷通。明月照，白雲籠。  
獨自坐，一老翁。

○寒山子，長如是。獨自居，不生死。

# 拾遺二首新添

○我見世間人，箇箇爭意氣。一朝忽然死，只得一片地。  
闊四尺，長丈二。汝若會，出來爭意氣。我與汝，立碑  
記。

○家有寒山詩，勝汝看經卷。書放屏風上，時時看一遍。

## 豐干禪師錄

道者豐干，未窮根裔，古老見之，居于天台山國清寺，翦髮齊眉，毳裘擁質緇素。問鞠乃云，隨時貌悴，昂藏恢端七尺，唯攻舂米供僧，夜則扃房吟詠自樂。郡縣譖知，咸謂瘋僧，或發一言，異於常流。忽爾一日，騎虎松徑來入國清，巡廊唱道，眾皆驚訝，怕懼惶然，並欽其德。昔京輦與胤救疾，到任丹丘跡無，追訪賢人隱遯，示化東甌，唯於房中壁上書曰：

余自來天台，凡經幾萬迴。一身如雲水，悠悠任去來。  
逍遙絕無鬧，忘機隆佛道。世途歧路心，眾生多煩惱。  
兀兀沈浪海，漂漂輪三界。可惜一靈物，無始被境埋。

電光燄然起，生死紛塵埃。寒山特相訪，拾得罕期來。  
論心話明月，太虛廓無礙。法界即無邊，一法普遍該。  
本來無一物，亦無塵可拂。若能了達此，不用坐兀兀。

## 拾得錄

豐干禪師、寒山、拾得者，在唐太宗貞觀年中，相次垂跡於國清寺。拾得者，豐干禪師因遊松徑，徐步於赤城道路側。偶而聞啼，乃尋其由，見一子可年十歲，初謂彼村牧牛之子。委問逗遛，云：「我無舍無姓」。遂引至寺，付庫院候人來認，數旬之間絕其親鞠。乃令事知庫僧靈熠，經于三祀，頗會人言，令知食堂，香燈供養。忽於一日，與像對坐，佛盤同餐。復于聖僧前云小果之位，喃喃呵俚，而言傷哉。熠謂老宿等，此子心瘋，無令下供養。乃令廚內洗瀘器物，每澄食滓，而以筒盛。寒山子來，負之而去。或發一言，我有一珠，埋在陰中，無人別

者。眾謂癡子。寺內山王，僧常參奉，及下供養香燈等務。食物多被鳥所耗。忽一夜，僧眾同夢見山王云：「捨得打我，瞋云：『汝是神道，守護伽藍，更受沙門參奉供養，既有靈驗，何以食被鳥殘？今後不要僧參奉供養。』」至旦，僧眾上堂，各說所夢，皆無一差。靈燭亦然。喧喧未止，燭下供養，忽見山王身上而有杖痕所損。燭乃報眾，眾皆奔看，各云夜夢斯事。乃知捨得不是凡間之子。一寺紛紜，具狀申州，報縣符下：賢士遯跡，菩薩化身，宜令號爲捨得賢士。自此後常使淨人直香火供養又於莊頭牧牛，歌詠叫天。又因半月布薩，眾僧說戒，法事合時。捨得驅牛至堂前，倚門而立，撫掌微笑曰：「悠悠哉！聚頭作相，這箇如何？」老宿律德怒而呵云：「下人瘋狂，破於說戒。」

捨得笑而言曰：「無瞋即是戒，心淨即出家。我性與汝合，一切法無差。」尊宿出堂打趁捨得，令驅牛出去。捨得言：「我不放牛也。此群牛皆是前生大德知事人，咸有法號，喚者皆認。」時捨得一一喚牛，云前生律師弘靖出時，一白牛作聲而過。又喚前生典座光超出時，一黑牛作聲而過。又喚直歲靖本出時，一牯牛作聲而出。又喚云前生知事法忠出時，一牯牛作聲而出。乃獨牽謂牛曰：「前生不持戒，人面而畜心。汝今招此咎，怨恨於何人。佛力雖然大，汝幸於佛恩。」大眾驚訝忙然。因茲又報州縣。使令入州，不赴召命，盡代人仰。因此顯現。寺眾徧徨，咸歎菩薩來於人世。聊纂實錄，貴不墜爾。兼於土地堂壁上，書語數聯，貴示後人。乃集語曰：

東洋海水清，水清復見底，靈源湧法泉，研水無刀痕。  
我見頑囂士，燈心柱須彌，寸樵煮大海，甲抹大地石。  
蒸砂豈成飯，磨磚將作鏡，說食終不飽，直須著力行。  
恢恢大丈夫，堂堂六尺士，枉死埋冢間，可惜孤標物。  
不見日光明，照耀於天下，太清廓落洞，明月可然貴。  
余本住無方，盤泊無爲理，時陟涅槃山，徐步香林裏。  
左手握驪珠，右手執摩尼，莫耶未足刃，智劍斬六賊。  
般若酒清冷，飲啄澄神思，余閑來天台，尋人人不至。  
寒山同爲侶，松風水月間，何事最幽邃，唯有遯居人。  
悠悠三界主，古佛路棲棲，無人行至此，今跡誰不蹋。  
旋機滯凡累，可畏生死輪，輪之未曾息，嗟彼六趣中。  
茫茫諸迷子，人懷天真佛，大寶心珠祕，迷盲沈沈流。  
汨沒何時出。

拾得自閻丘太守拜後，同寒山子把手走出，寺跡隱。後因國清僧登南峰采薪，遇一僧，似梵儀，持錫入巖，挑鎖子骨而去，乃謂僧曰：「取拾得舍利。」僧遂白寺眾，眾方委捨得在此巖入滅，乃號爲拾得巖。在寺東南隅，登山二里餘地。聊錄如前，貴示後人矣。

# 拾得詩

○諸佛留藏經，只爲人難化。不唯賢與愚，箇箇心構架。  
造業大如山，豈解懷憂怕。那肯細尋思，日夜懷奸詐。

○嗟見世間人，箇箇愛喫肉。碗碟不曾乾，長時道不足。  
昨日設箇齋，今朝宰六畜。都緣業使牽，非干情所欲。  
一度造天堂，百度造地獄。閻羅使來追，合家盡啼哭，  
鑪子邊向火，鑊子裏洗澡。更得出頭時，換卻汝衣服。

○出家要清閑，清閑即爲貴。如何塵外人，卻入塵埃裏。  
一向迷本心，終朝役名利。名利得到身，形容已憔悴。  
況復不遂者，虛用平生志。可憐無事人，未能笑得爾。

○養兒與娶妻，養女求媒娉。重重皆是業，更殺眾生命。  
聚集會親情，總來看盤釘，目下雖稱心，罪簿先注定。

○得此分段身，可笑好形質。面貌似銀盤，心中黑如漆。  
烹豬又宰羊，誇道甜如蜜。死後受波吒，更莫稱冤屈。

○佛哀三界子，總是親男女。恐沈黑暗院，示儀垂化度。  
盡登無上道，俱證菩提路。教汝癡眾生，慧心勤覺悟。

○佛捨尊榮樂，爲愍諸癡子。早願悟無生，辦集無上事。  
後來出家者，多緣無業次。不能得衣食，頭鑽入於寺。

○嗟見世間人，永劫在迷津。不省這箇意，修行徒苦辛。

○我詩也是詩，有人喚作偈。詩偈總一般，讀時須仔細。  
緩緩細披尋，不得生容易。依此學修行，大有可笑事。

○有偈有千萬，卒急述應難。若要相知者，但入天台山。  
巖中深處坐，說理及談玄。共我不相見，對面似千山。  
○世間億萬人，面孔不相似。借問何因緣，致令遭如此。  
各執一般見，互說非兼是。但自修己身，不要言他已。  
○男女爲婚嫁，俗務是常儀。自量其事力，何用廣張施。  
取債誇人我，論情入骨癡。殺他雞犬命，身死墮阿鼻。  
○世上一種人，出性常多事。終日傍街衢，不離諸酒肆。  
爲他作保見，替他說道理。一朝有乖張，過咎全歸你。  
○我勸出家輩，須知教法深。專心求出離，輒莫染貪婬。  
大有俗中士，知非不愛金。故知君子志，任運聽浮沈。  
○寒山住寒山，捨得自捨得。凡愚豈見知，豐干卻相識。  
見時不可見，覓時何處覓。借問有何緣，向道無爲力。

- 從來是捨得，不是偶然稱。別無親眷屬，寒山是我兄。  
兩人心相似，誰能徇俗情。若問年多少，黃河幾度清。
- 若解捉老鼠，不在五白貓。若能悟理性，那由錦繡包。  
真珠入席袋，佛性止蓬茅。一群取相漢，用意總無交。
- 運心常寬廣，此則名爲布。輟己惠於人，方可名爲施。  
後來人不知，焉能會此義。未設一庸僧，早擬望富貴。
- 獮猴尚教得，人何不憤發。前車既落阨，後車須改轍。  
若也不知此，恐君惡合殺。此來是夜叉，變即成菩薩。
- 君不見，三界之中紛擾擾，只爲無明不了絕。一念不生  
心澄然，無去無來不生滅。
- 故林又斬新，剡源谿上人。天姥峽關嶺，通同次海津。  
灣深曲島間，森森水雲雲。借問嵩禪客，日輪何處暾。

○自笑老夫筋力敗，偏戀松巖愛獨遊。可歎往年至今日，任運還同不繫舟。

○一入雙谿不計春，鍊曝黃精幾許斤。鑪竈石鍋頻煮沸，土甌久蒸氣味珍。注誰來幽谷餐仙食，獨向雲泉更勿人。延齡壽盡招手去，此棲終不出山門。

注：一作拍手去

○躡躅一群羊，沿山又入谷。看人貪竹塞，且遭豺狼牧。元不出孳生，便將充口腹。從頭喫至尾，飼餉無餘肉。  
○銀星釘稱衡，綠絲作稱紐。買人推向前，賣人推向後。不顧他心怨，唯言我好手。死去見閻王，背後插掃帚。  
○閉門私造罪，準擬免災殃。被他惡部童，抄得報閻王。縱不入鑊湯，亦須臥鐵床。不許雇人替，自作自身當。

○悠悠塵裏人，常道塵中樂。我見塵中人，心生多愍顧。  
何哉愍此流，念彼塵中苦。

○無去無來本湛然，不居內外及中間。一顆水精絕瑕翳，  
光明透滿出人天。

○少年學書劍，叱馭到荊州。聞伐匈奴盡，婆娑無處遊。  
歸來翠巖下，席草覩清流。壯士志未騁，獮猴騎土牛。  
○三界如轉輪，浮生若流水。蠹蟲諸品類，貪生不覺死。  
汝看朝垂露，能得幾時子。

○閑入天台洞，訪人人不知。寒山爲伴侶，松下噉靈芝。  
每談今古事，嗟見世愚癡。箇箇入地獄，早晚出頭時。  
○古佛路淒淒，愚人到卻迷。只緣前業重，所以不能知。  
欲識無爲理，心中不掛絲。生生勤苦學，必定睹天師。

○各有天真佛，號之爲寶王。珠光日夜照，玄妙卒難量。

盲人常兀兀，那肯怕災殃。唯貪婬泆業，此輩實堪傷。

○出家求出離，哀念苦眾生。助佛爲揚化，令教選路行。何曾解救苦，恣意亂縱橫。一時同受溺，俱落大深阱。

○常飲三毒酒，昏昏都不知。將錢作夢事，夢事成鐵圍。以苦欲捨苦，捨苦無出期。應須早覺悟，覺悟自歸依。

○雲山疊疊幾千重，幽谷路深絕人蹤。碧澗清流多勝境，時來鳥語合人心。

○後來出家子，論情入骨癡。本來求解脫，卻見受驅馳。終朝遊俗舍，禮念作威儀。博錢沽酒喫，翻成客作兒。

○若論常快活，唯有隱居人。林花長似錦，四季色常新。或向巖間坐，旋瞻見桂輪。雖然身暢逸，卻念世間人。

○我見出家人，總愛喫酒肉。此合上天堂，卻沈歸地獄。  
念得兩卷經，欺他道塵俗。豈知塵俗士，大有根性熟。

下五首與前長偈語句同

○我見頑鈍人，燈心柱須彌。蟻子齧大樹，焉知氣力微。  
學咬兩莖菜，言與祖師齊。火急求懺悔，從今輒莫迷。

○君見月光明，照燭四天下。圓暉掛太虛，瑩淨能蕭灑。  
人道有虧盈，我見無衰謝。狀似摩尼珠，光明無晝夜。

○余住無方所，盤泊無爲理。時陟涅槃山，或覩香林寺。  
尋常只是閑，言不干名利。東海變桑田，我心誰管你。

○左手握驪珠，右手執慧劍。先破無明賊，神珠自吐燄。  
傷嗟愚癡人，貪愛那生厭。一墮三途間，始覺前程險。

○般若酒泠泠，飲多人易醒。余住天台山，凡愚那見形。

常遊深谷洞，終不逐時情。無思亦無慮，無辱也無榮。

此下與寒山詩大同小異語意相涉

○自從到此天台寺，經今早已幾冬春。山水不移人自老，見卻多少後生人。

○平生何所憂，此世隨緣過。日月如逝波，光陰石中火。任他天地移，我暢巖中坐。

○嗟見多知漢，終日枉用心。歧路逞嘍囉，欺謾一切人。唯作地獄滓，不修來世因。忽爾無常到，定知亂紛紛。

○迢迢山徑峻，萬仞險隘危。石橋莓苔綠，時見白雲飛。瀑布懸如練，月影落潭暉。更登華頂上，猶待孤鶴期。

○松月冷颼颼，片片雲霞起。丁庵匝幾重山，縱目千萬里。谿潭水澄澄，徹底鏡相似。可貴靈臺物，七寶莫能比。

○世有多解人，愚癡學閑文。不憂當來果，唯知造惡因。  
見佛不解禮，睹僧倍生瞋。五逆十惡輩，三毒以爲鄰。  
死去入地獄，未有出頭辰。

○人生浮世中，箇箇願富貴。高堂車馬多，一呼百諾至。  
吞併他田宅，準擬承後嗣。未逾七十秋，冰消瓦解去。

○水浸泥彈丸，思量無道理。浮漚夢幻身，百年能幾幾。  
不解細思惟，將言長不死。誅剝壘千金，留將與妻子。

○雲林最幽棲，傍澗枕月谿。松拂盤陀石，甘泉湧淒淒。  
靜坐偏佳麗，虛巖矇霧迷。怡然居憩地，日以下缺

○可笑是林泉，數里少人煙。雲從巖嶂起，瀑布水潺潺。  
猿啼唱道曲，虎嘯出人間。松風清颯颯，鳥語聲關關。  
獨步繞石澗，孤陟上峰巒。時坐盤陀石，偃仰攀蘿沿。  
遙望城隍處，惟聞鬧喧喧。

此首係別本增入

普爲出資及讀誦受持  
輾轉流通者回向偈曰

願以此功德 消除宿現業  
增長諸福慧 圓成勝善根  
所有刀兵劫 及與饑饉等  
悉皆盡滅除 人各習禮讓  
讀誦受持人 輾轉流通者  
現眷咸安樂 先亡獲超昇  
風雨常調順 人民悉康寧  
法界諸含識 同證無上道

## 寒山子詩集 附：豐干・拾得詩

福智之聲出版社

台北市南京東路四段 137 號 12 樓

電話：(02) 25452546

傳真：(02) 25452547

中華民國八十八年五月恭印 1000 本 (第一版第一刷)

行政院局版台業字 5601 號

免費結緣

國家圖書館出版品預行編目資料

寒山子詩集. -- 第一版. -- 臺北市：福智之  
聲，民 88  
面； 公分

ISBN 957-97823-1-8(平裝)

851. 441

88007329